

Ī yu'xarij ti anaquéej jo'yú'xaca' i San Pablo a'íj ti huata'ítyi'ri' i Timoteo

Pablo pu jatyojtye'

¹ Nyáaj Pablo, i nyaj jahuiire' i Ciriistu' ti Jesús pué'een, a'yaa pu i Dios tyina'antyíhuoo ajta i Ciriistu' ti ajta Jesús pué'een i tyaj jajchó've',

² a'yaa nu tyí'muatyojtye' Timoteo, mu paj nyiyóoj pué'een a'íjna i tyaj jitzán tyá'tzaahuatye'. Che' i Dios ajta i Ciriistu' ti Jesús pué'een i tavástara', che' a'íin tyámua' tyimuáacha'íin, ajta muá'ancu'vaxi'ín ajta ajimi séjre'ej i ti jin tyámua' muáaruuj.

I maj hue'tzij jin tyihuá'mua'tyej

³ A'yájna nyati'ij nyeríj tyimuaatáhuaviiri' nyati'ij a'áa joomá'caj a Macedonia, a'áa paj jo'tyá'itzeerej a Éfeso, pej pij séecan huata'íjtye'en mej mij quee hue'tzij jin tyihuá'mua'tyej,

⁴ majta quee a'íj jitze tyúu'iteeritye'ej je'ej maj tyityetyúucha'íica'aj i tahuásimua'ci'ij. A'yaa pu'uj tyí'huiire' mej mij a'íjna jin huatóonyo'si'tye'en, capu tyí'huiire' mej mij a'íjna jin a'yan huárinyij je'ej ti i Dios tyá'xie've'.

⁵ A'íjna i paj jin tyihuo'ta'íjtye'sij a'íi pu a'íin pué'een i maj jin huóoxie've'en séej majta séej, a'íjna jime' i xiéjnyu'carij ti jí'ren, majta i maj jin

tyámua' metyityoomuámua're'ej, majta jì'ré'can jìme' ja'tzaahuatye' i tavástara'.

⁶ Séecan mu meríj a'íjna jin je'ej pua'aj huaríj majta jó'vej a'íjna jìme' i nyúucarij tiquee tyi'táj huiire'.

⁷ A'yaa mu tyá'xie've' maj huo'mua'tyej i nyúucaria'ra' i Dios, majta a'íimaj quee yo'itéej je'ej maj tyí'xaj, nusu je'ej maj tyi'táj tyihuá'mua'tyej a'yan metyuuséerataj tijin tyámua' mu naa tyá'mua'reej.

⁸ A'yaa tu tyá'mua'reej ti tyí'huiire' i nyúucarij i maj jin tyí'ijta, tipua'aj a'yan muáarinyij je'ej ti tyúuxie've' a'íjna jitze.

⁹ Tyiche' jo'támua'reej ti i nyúucarij i maj jin tyí'ijta quee a'íjma jimi huatyátuiihuaca' i maj tyámua' tyityetyúucha'ij. A'íjna i nyúucarij a'íjma pu jimi huatyátuiihuaca' i maj quee tyihuojó'itej, i maj quee tyu'namuaj, i maj je'ej pua'aj ricij, i maj tyi'ijxána'cira', i maj quee tzáahuatyira'aj jimi tyícha'ij i Dios, i maj já'xaahuataj i huá'yi'raj, i maj huá'cui'caa i juhuásimua', ajta néijmi'caa jimi i maj tyi'tyacui'caa,

¹⁰ ajta a'íimaj jimi i maj juxana'cire' úucaa jamuán, nusu séecan jamuán i tyétyacaa, i maj tyi'táj jin je'ej pua'aj ricij, i maj tyí'hue'tacaa, a'yaa ti'ij huatóomua'aj tijin néijmi'i i maj je'ej pua'aj tyihuá'mua'tyej tyi'táj tiquee xá'puí'.

¹¹ A'yaa pu tyi'mua'taj a'íjna i nyúucaria'ra' i Dios i ti nyéetzij a'yan tyinaata'íj nyej nyij huó'ixaatye'en.

I Dios ti jin ja'ancu'vaxij a'íjci i Pablo

12 Nyetye'tyojtzire' a'íjci i ti ca'nyíjra'aj ny-atá'caa, nyajta i Ciríistu' ti Jesús pué'een i tavástara', ji'nye a'yaa pu naatamua'aj tijin nyaj quee tyi'tíj jin ootyá'itzee, ajta na'antyíhuoj nyej nyij jaatyáhuire'en,

13 tyij nyajta jájcuaj imuáj je'ej pua'aj tyi'tyínyecha'hica'aj, je'ej nu pua'aj ja'uuriajca'aj nyajta je'ej pua'aj tyé'jeevaca'aj. Ajta i Dios pu ná'ancu'vaxi' nyéetzij, ji'nye canu nyeexúj tyá'tzaahuatya'ca'aj nyajta quee jamua'reeriaca'aj je'ej nyaj rijcaj.

14 Ajta i tavástara' jéehua pu huápu'i'ij tyámua' tyinyejcha'hij ta'raj, a'hí pu naatá' i nyaj jin tyá'tzaahuatye' ajta nyej nyij huo'xié've'en a'íjna jitze ma'can i Ciríistu' ti ajta Jesús pué'een.

15 A'yaa pu tyi'ja'yájna, a'yaa pu'ij tyúuxie've' maj néijmi'i tyá'antzaahuatye'en ti i Ciríistu' a'íjna jin yatanyéj íyan i cháanacaj japua ti'ij hui'rátoonyij a'hijma i maj je'ej pua'aj tyi-tyetyúucha'hij, nyáaj nu síj a'hín pué'een i nyaj je'ej pua'aj tyi'tyínyecha'hica'aj.

16 Ajta i Dios pu ná'ancu'vaxij, a'íj pu jimi i Ciríistu' naataséjraj ti jéehua nyaxie've'. A'yaa nu nyij nyáaj tyí'huire' ti'ij i maj jitzán jaaséej a'himaj i maj tyá'tzaahuatye' i maj jusén jin júurij muá'ju'un.

17 Tyiche' jaatyátzaahuatye'en tyajta tyaatatyójtzi're'en a'íjci i tajtúhuan ti jusén jin tyi'tyéjvee, capu a'náj mui'nyij, ajta síj na'aj a'hín pué'een i Dios. Che' a'yan tyá'ra'nyij.

18 Nyiyóoj Timoteo, a'yaa nu tyí'mua'ijcatye' paj a'íjna jin huatyényo'se'en i paj jin tyámua'

naa tyí'huüre' i tavástara' jimi, a'yájna mati'ij anaquéej a jimi tyu'taxájtaca' a'íimaj i maj tyí'xaj i Dios jítze ma'can.

¹⁹ Séecan i maj quee a'yan huaríj je'ej maj hua' jimi tyu'taxájtaca', a'íi mu huamué'tichej i maj jítzán tyá'tzaahuatya'ca'aj.

²⁰ A'yaa pu tyihuó'ruuj a'íjma i Himeneo ajta i Alejandro, i nyaj nyeríj tyu'tátuii i tyiyáaru' jimi, mej mij jáari'rej maj quee je'ej pua'aj tyá'xajta i Dios.

2

Je'ej maj ye'ej tyityeetyényuunyij

¹ A'yaa nu tyaja'muahuavíj siaj jéehua jahuocaj i Dios jimi siajta tyé'tyojtzire'ej néijmi'caa jime' i tyeítyee.

² A'yaa pu tyúuxie've' siaj hua' jime' jahuocaj i maj tyityatatyíj siajta néijmi'caa jime' i maj tajtúhuan jin tyityetyu'uj, tyata'aj tyij taxáahuaj mahuacháatime'nyij, tyajta tyámua' tyi'tyitacha'íj néijmi'caa jimi.

³ A'yaa pu tyí'xa'pui' ajta a'yan tya'ráanajchi i Dios ti tajapúa huatanyúj,

⁴ Ji'nye a'yaa pu i Dios tyá'xie've' ti néijmi'caa táahuüre'en ajta maj néijmi'i jáamua'reej i ti jì're'can jime' a'íjna jimi.

⁵ Ji'nye síj pu'uj i Dios, ajta síj na'aj a'íin pué'een i ti hua' japua huatanyúj i tyeítyee i maj jin ootyá'itzee i Dios jimi. A'íi pu a'íin pué'een i Ciriístu' ti Jesús pué'een.

⁶ A'íi pu tajitzé ma'can huamuí' tí'ij néijmi'caa táahuüre'en ajta tyej tyij a'yan

tyihuo'té'exaatye'en i tyeítýee je'ej ti i Dios tyaaxá'pui'intarej.

7 Ajta tyej tyij a'yan tyihuo're'ixaatye'en i tyeítýee, a'íj pu jin nyéetzij na'antyíhuoj nyej nyij tyu'tyáhuüre'en i Dios jimi, ajta nyej nyij huo'mua'tyej i maj jitzán tyá'antzaahuatye'en, i ti a'yan tyi'ja'yájna, a'íjma i maj quee Israel jitze ajtyáma'can. Nyajta tzáahuatyira'aj jin tyi'xaj, canu tyi'hue'ej.

8 A'yaa nu nyij tyá'xie've' maj i tyétyacaa néijmi'que' jahuoocaj, majta ajméjca'taxi'in i Dios jimi tyámua' ma' éenye'ej i jutzájta' majta quee nyinyu'cacuj, nusu múujaaxiejvi'raj.

9 A'yaa nu nyajta tyá'xie've' maj i úucaa tyámua' mana'aj tyu'tyóochejtýej je'ej ti tye'tyévijtýe', miche' quee huápu'íj tyámua' ju'uurej i jucipuáj jitze, miche' majta quee tyo'carújtýa'ajma'aj tyi'tíj ti ooroj tyi'pue'éenye'ejmee, nusu tyi'tíj peerla, nusu maj a'íjna tyi'tyóoche'tyahua'an i cáanarij ti tyá'najchij.

10 Miche' a'íjna jin tyámua' huóo'uurej i maj jin i séecan jamua'reej maj tyámua' tyi'tyetyeityee, a'yájna ti'íj tye'tyévijtýe' a'íjma'aj jimi i úucaa i maj tyá'tzaahuatye' i Dios jimi.

11 A'yaa pu tyúuxie've' maj i úucaa tyámua' naa néijmi'i tyu'namuaj je'ej maj tyihuá'ixaatye', majta néijmi'i jin tyu'tyátzaahuatye'en,

12 nyajta quee tyi'tá'caa maj i úucaa tyihuá'mua'tyej u tyeyúuj tzajta', miche' majta quee tyihuá'ijtýe'ej i tyétyacaa. A'yaa nu tyá'xie've' maj quee ave'nyuuca'an,

¹³ ji'nye Dios pu anaquéej a'íj huatyátaahuaca' i Adán, ajta je'en i Eva,

¹⁴ ajta i Adán capu a'tíj jáacuanamuaj, sulu Eva pu i tyiyáaru' jáacuanamuaj, a'íj pu jin ootyá'itzeerej i Dios jimi.

¹⁵ Ajta a'yaa pu tyá'huiire'en i íitaj tipua'aj tyámua' tyihuó'cha'iin i juyójmua', ajta tyámua' tyá'tzaahuatye'ej, hua'xie've'ej i séecan ajta ji'réenya'aj i jutzájta'.

3

Je'ej maj huárinyij i maj tyihuá'ixaatye' u tyeyúuj tzajta'

¹ A'yaa pu tyi'ja'yájna. Típua'aj a'tíj a'yan tya'xié've'ej ti a'íjna jin antyúumua'reeriaj ti tyihuó'ixaatye'en i tyeyúuj tzajta', a'yaa pu tyá'xie've' ti tyi'tíj jin tyámua' huárinyij.

² A'íj pu jin, a'íjna i ti a'yan tyi'tíj jin tye'entyúumua'reeriaj, a'yaa pu tyúuxie've' tíquee tyi'tíj jin á'itzeeria'aj. Ajta ti séej na'aj tyévi'tinye'en i íitaj, ti'ij tyámua' éenye'que' séjre'ej mata'aj tzaahuatyi'ra'aj jimi tyícha'íij. Ajta a'náj tina'aj a'yan tya'ajxié'vi'ra'aj ti tyámua' tyihuo'tyéjeevej i maj jamua'reej jo'tíj ja'chej, ti ajta jaayí'tihua'an ti tyámua' tyihuó'mua'tyej,

³ ajta quee jutahueeve'ej, ajta quee junyo'se've'ej, che' tyámua' tyí'tyevistan a'íjma jimi i tye'ítyee, ajta quee janyacua'tzaj i túmii.

⁴ A'yaa pu tyúuxie've' ti tyámua' naa atyeje'chej, majta i yójmua'mua' janamuajraj,

majta néijmi'i i maj jamuán aja'chej tyámua' tyityetyúucha'íj,

⁵ ji'nye tìpua'aj quee jaayí'tihua'an ti tyámua' tyihuo'ta'íjtye'en a'íimaj i maj jamuán aja'chej, ¿ji'nye tyí'rij ti tyámua' tyihuó'cha'íin a'íimaj i maj jusí'rii i Dios jimi?

⁶ A'íj pu jin a'yan tyúuxie've', ti a'íjna i ti tyihúa'mua'tyej quee oochán na'aj tyá'antzaahuatye'en, na'ríj quee a'íi pu óotzaahuatye'en a'íjna jime' ti tyi'tíj jin tyi'tyéjvee, ti'ij ij a'yan tyí'mue'tiche'en ti'ij i tyiyáaru'.

⁷ A'yaa pu ajta tyúuxie've' maj tzáahuatyi'ra'aj jimi tyícha'íj i maj quee tyá'tzaahuatye', mej mij quee séecan jaatyáxaahuataj nusu i tyiyáaru' tyi'tíj jin ja'antyimué'tin.

Je'ej maj tyityetyúucha'íj i maj tyi'tíj jin antyúumua'reej u tyeyúuj tzajta'

⁸ A'íimaj i maj tyi'tíj jin antyúumua'reej u tyeyúuj tzajta', a'yaa pu tyúuxie've' maj tyétyacaa pué'eenye' maj tzáahuatyi'ra'aj hua' jimi tyícha'íj, maj quee a'náj tyí'hue'taj, majta quee juta'rujve'ej, majta quee janyacua'tzaj i túmii i maj jaamué'tíj hue'tzij jime'.

⁹ A'yaa pu tyúuxie've' maj néijmi'i ántzaahuatye'en a'íjna i ti ju'avaataca'aj i Dios jimi, majta tyámua' naa metyityoomuámua're'ej.

¹⁰ A'yaa pu ajta tyúuxie've' maj i tyeítyee huo'séj maj jaataséjrataj i maj jaaxá'pui'intarej, tìpua'aj mequee tyi'tíj jin je'ej pua'aj tyí'tyesejre'ej, aj mu mij tyi'tíj jin antyúumua'reeriaj muá'ju'un u tyeyúuj tzajta'.

11 A'yaa pu'uj tána'aj tyí'een i úucaá jimi, maj tzáahuatyí'ra'aj jin séjre'ej, majta quee je'ej pua'aj tyí'xaxa'ta'an, maj quee tyi'tíj jin á'itzeeria'aj.

12 Síij ti tyí'huüre' u tyeyúuj tzajta', a'yaa pu tyúuxie've' ti séej na'aj i íitaj tyévi'tinye'en, ajta jaayí'tihua'an ti tyihuo'ta'íjtye'en i juyójmua', ajta néijmi'caa i maj jamuán aja'chej.

13 Ji'nye a'íimaj i maj tyámua' tyí'huüre' u tyeyúuj tzajta', a'íi mu jamue'tin mej mij tyámua' huojosejra i tyeítyee, majta juxáahuaj séeria'aj muá'ju'un a'íjna jime' maj tyá'tzaahuatye' i Ciriístu' jimi ti Jesús pué'een.

I nyúucarij ti jì're'can jime' i Dios taataséjratyej

14 A'yaa nu tyi'ijchó've'ej nyaj jiye'tzín muojotyéesej, a'íj nu jin a'yan tyí'muayu'se',

15 tipua'aj nyequee jiye'tzín a'áa ja'tanyéj, a'yaa nu tyá'xie've' paj jáamua'reej je'ej maj huárinyij a'íimaj i tyeítyeristyamua'me'en i Dios, maj a'íin pué'een i maj jusi'rii u tyeyúuj tzajta', mej mij tyaatatyójtzi're'en i Dios ti júurij, i ti huá'huüre' ajta a'íj huá'ixaatye' i ti a'yan tyi'ja'yájna.

16 A'yaa tu tyá'mua'reej ti i nyúucarij i tyaj jitzán tyá'tzaahuatye' jo'tij na'aj séjre', ji'nye a'yaa pu tyá'xaj i yu'xarij jitze tijin:

Ciriístu' pu a'yan tyu'tóosejrataca' ti'ij tyáati', tyu'tyáamue'tij a'íjna jime' i júuricama'ra' i Dios,

majta jaaséj i maj tajapuá tyí'huüre'.

Néijmi'que' mu i cháanacaj japua tyihuo'té'exaaaj
 a'íjna jitze ma'can,
 majta tyá'antzaahuaj a'íjna jimi,
 ajta i Dios yo'ví'tij u tajapuá.

4

I maj hue'tzij jime' tyihuá'mua'tyej

¹ Ajta i júuricama'ra' i Dios, a'yaa pu
 tyí'xaj ja'huoo'itéerican jime' maj séecan
 jaatyáhue'taj i maj jitzán tyá'tzaahuatye', mej
 mij a'íjma ántzaahuatye'en i maj hue'tzij jin
 tyihuá'mua'tyej a'íjna jitze ma'can i tyiyáaru'.

² A'íjma mu ántzaahuatye'sij i maj je'ej
 pua'aj tyí'jepe' majta tyí'hue'tacaa, je'ej mu
 pua'aj tyityetyúucha'ij, majta je'ej pua'aj mety-
 ityoomuámua're'.

³ A'íimaj tyeítyeera' metyu'ijmuej maj quee
 nyejnyeí'chaj, ajta maj je'cácaa mana'aj
 tyí'cua'ajcaj i ti tyí'cue'ri' i Dios ti a'yan
 tyu'tyájtoo, mej mij tyú'cua'nyij i maj
 tyá'tzaahuatye', majta i maj jamua'reej i ti
 a'yan tyi'ja'yájna metye'tyóotzi'ria'aj.

⁴ Ji'nye néijmi'i i Dios ti tyú'taahuaca' tyámua'
 pu tyí'een, a'íj tu jin néijmi'i tya'ancuriáa'sij
 tyetye'tyóotzi're'ej i Dios,

⁵ ji'nye i nyúucaria'ra' i Dios ajta i tyaj jin
 jahuoo jimí, a'íj pu tyámua' néijmi'i tyí'uurej.

Síj ti tyámua' naa tyí'huüre' i Ciríistu' jimi

⁶ A'íj paj huo'mua'tyej a'íjma i maj
 tyá'tzaahuatye', aj pej pij tyámua'
 tyu'tyáhuüre'sij i Ciríistu' jimi ti ajta Jesús

pué'een, petyu'tyáhuüre'sij a'íjna jitze i nyúucarij i paj jitzán tyá'antzaahuaj mat'íj muaamuá'tyej.

⁷ Capáj já'tzaahuatya'aj a'íjci i nyúucarij úyan ti ma'can i cháanacaj japua. Pata'aj jáari'rej paj a'yan huárinyij je'ej ti i Dios tyá'xie've',

⁸ tyij ajta cí tyí'huüre' tipua'aj pahuá'cua'ajtye'en pej pij huatyá'ca'nyej i mua' tyévij jitze, ajta paj a'yan huárinyij je'ej ti tyá'xie've' i Dios jéehua pu tyí'huüre', ijíj paj pooj a'yan séejre' i cháanacaj japua, ajta muaatyáhuüre'ej pej pij júurij puá'ra'nyij jusén jime'.

⁹ A'yaa pu tyi'ja'yájna, ajta a'yan tyúuxie've' mej mij néijmi'i ja'antzaahuatye'en.

¹⁰ A'íj tu jin tyí'muarie' tyajta a'íjna jin nyo'se', ji'nye a'íj tu jitze tyi'ijchó've' i Dios ti júurij, i ti néijmi'caa huüre' i tyeítyee, ajta jéetze' a'íjma i maj tyá'tzaahuatye'.

¹¹ A'yaa paj tyihuo'ta'íjtye'en pajta a'yan tyihuó'mua'tyej.

¹² Capáj tyi'tá'care'en maj muá'xaahuataj a'íjna jime' paj quee a'chu vásti', sulu a'yaa paj tyihuo'tyáhuüre'en i maj tyá'tzaahuatye' mej mij muéetzij jitze tyi'huó'iteeritye'en je'ej paj tyí'xaj, je'ej paj tyi'tyía'cha'ij, ajta je'ej paj tyihuá'xie've', pajta tyámua' huárinyij a'íjna jitze i tyaj jitzán tyá'tzaahuatye', pej pij tyámua' eenye'en a tzajta'.

¹³ A'yaa paj pooj rijcaj, 'asta nyequee a'áa ja'rá'astij, pata'aj huo'tánamuajraste'en i yu'xarij pajta tyihuó'mua'tyej pata'aj pij a'íjna

jìn ca'nyíjra'aj huo'tá'an.

¹⁴ Capáj jaxaahuataj tyi'tíj ti je'ej i Dios tyimuaatapuéjve mati'ij huásij mua'vá'muariej, majta tyu'taxájtaca' ajime' i Dios jitze ma'can.

¹⁵ Pata'aj tyámua' huárinyij a'íjna jitze, pajta a'íj jitze tyihuá'mua'tyej, mata'aj mij néijmi'i muaaséj paj néijmi'i jìn tyámua' ricij.

¹⁶ Tyámua' paj tyi'huá'cha'íin, pajta je'ej paj tyi'tíj tyihuá'mua'tyej i séecan, pajta pooj tyámua' tyu'mé'en. Típua'aj a'yan puáarinyij, muáaj paj asíj a japua huatányuusij, pajta a'íimaj japua i maj muanamuajran.

5

Je'ej maj tyityetyúucha'íij a'íjma jimi i maj tyá'tzaahuatyé'

¹ Capáj je'ej pua'aj tyé'tya'xi'ij i ti arí vascacirie', sulu tyámua' paj tyeetyéjeevej pati'ij a' táataj, pajta a'íjma i maj tyáamua, pata'aj tyámua' tyihuo'tyéjeevej pati'ij a'ihuáamua'.

² Pajta i ucarijsee tyámua' paj tyihuo'tyéjeevej a'yájna pati'ij a' náanaj, pajta i maj íimuaa a'yájna pati'ij á'cu'tzimuj, tyámua' paj néijmi'caa tyu'tyéjeevej.

³ Pata'aj huo'táhuíire'en i úucaa i maj huóojímua'astariaca', tipua'aj mequee je'ej tyéejviicue'raj tyi'tíj jime'.

⁴ Ajta tipua'aj síj i íiti' ti antyúusiijtariaca' tyiyójmua' na'ríj tyiyá'cuarimua'aj, miche' a'íimaj anaquéj jaatyáhuíire'en mej mij a'íjna jìn ja'rá'astej maj huo'tyáhuíire'en

ì jutyéítyeristyamua', jì'nye a'yaa pu tya ráanajchi ì Dios.

⁵ A'íjna ì íiti' tì jì'ré'can jìme' antyúusiijtariaca', ajta quee je'ej tyéejviicue', a'íj pu jitze tyi'ijchó've' ì Dios, ajta quee a'náj jaatapuá'citaj tì jahuoo, a'yaa pu a'náj tina'aj rinyij tújca ajta tíca'.

⁶ Ajta ì íiti' tì antyúusiijtariaca', ajta je'en a'yan rijcaj je'ej tì jimi tyúuxie've', a'yaa pu een ì Dios jimi tí'ij ì tì huamuí'.

⁷ A'yaa paj pajta tyihuo'ta'íjtye'en ì tyeítyee ì nyúucarij jìme' mej mij quee tyi'tíj jin á'itzeeria'aj.

⁸ Jì'nye a'tíj maj quee jitzán juxie've' ì tyeítyeristyamua'me'en, majta ì maj jamuán aja'chej, a'íí pu jaatyáxaahuataca' ì tì jitzán tyá'tzaahuatye', ajta jéetze' je'ej pua'aj ricij quee ì síij tiquee a'náj tyá'antzaahuaj.

⁹ A'íimaj ì maj huóojimua'astariaca', a'íjma papu'uj ooyú'xaj ì maj huéecatyej nyinyi'ra'aj jájcha'íj nusu jéetze', ajta maj séej mana'aj huávichej.

¹⁰ Ajta a'yan tyúuxie've' maj néijmi'i jamua'reeriaj maj xá'pui' ricij, majta tyámua' tyihuo'xá'pueeri' ì juyójmua', ajta huo'taxié've'en a'íjma ì maj jamuariacaa, nusu tì hua'nájo'sixij ì huá'íicaj jitze a'íimaj ì maj ajtyu'uj ì Dios jimi, ajta huo'táhuíi a'íjma ì maj jajpuéjtzij. Ajta a'íjna jìme' ì tì a'náj tina'aj tyámua' néijmi'i jin huaríj.

¹¹ Capáj a'íjma á'yu'xaj ì maj huóojimua'astariaca' majta móoj íimuaa, jì'nye

tipua'aj majtáhua'aj a'yan tyaataxie've'en maj huáhuichej, aj mu mij ajtáciniyij i Ciríistu' jimi,

¹² aj mu mij jéetze' ootyá'itzeere'sij i Dios jimi, a'íjna jime' maj jaatyáxaahuataca' je'ej maj anaquéej tyi'tíj jin tyitya'tóoraj.

¹³ Majta a'yan tyee'yí'tin maj mahuojo'muaarin i hua'chej méyee majta méyee, a'íj mumij jin jéehua hui'na'se', majta quee a'yaa mana'aj ricij sulu majta mu tyúuxajtave' je'ej tiquee tyi'tyéevijtij.

¹⁴ A'íj nu jin a'yan tyá'xie've' maj huáhuichej i maj móoj ímuari'taj mati'ij huóojimua'astariaca', miche' tyiyóomua'aj muá'ra'nyij, majta tyámua' tyu'muarie'en jo'maj ja'chej, mej mij quee tyi'tá'care'en ti i ti tájcha'íire' tyi'tíj jin hua' jitze tyo'ojpuá'ritye'en.

¹⁵ Ji'nye séecan i maj antyúujimua'astariaca' mu merij ajtacíj i Dios jimi, mej mij a'íj ántzaahuatye' i tyiyáaru'.

¹⁶ Tipua'aj síj i íiti' ti tyá'tzaahuatye', séecan jamuán ajá'chajcaj i maj huóojimua'astariaca', che' huo'táhuire'en, ti'ij quee huá'muarie'ristya'aj a'íjma i maj tyí'huire' u tyeyúuj tzajta', a'yaa pu tyu'tái'riitaríj mej mij huo'táhuire'en i maj huóojimua'astariaca' majta quee je'ej tyéejviicue'.

¹⁷ Majta i huásij i maj tyámua' tyí'muarie' u tyeyúuj tzajta', a'yaa pu tyúuxie've' maj tyámua' tyihuó'cha'íin, siajta jéetze' a'íimaj i maj tyi-huá'ixa'tyee majta i maj tyihuá'mua'tyej.

¹⁸ Ji'nye a'yaa pu tyé'yu'si' i yu'xarij jitze tijin: “Capáj ja'anjí'quihua'an i púuyej ti jayuu

ì tyeríicuj.” A'yaa pu ajta tyé'yu'si' tìjin: “A'yaa pu tyí'xa'pui' maj tyaanájchitye'en a'tíj tì tyí'muijhuacaa.”

19 Capáj tyi'tíj jitzán pua'ritye'ej ì vásti', tipua'aj síj na'aj tyi'tíj jitzán pua'ritye'ej, sulu miche' mahua'puaj, na'ríij mahueeícaj ì maj jitzán tyi'pua'ritye'.

20 Ajta ì maj móoj tyi'tíj jin je'ej pua'aj ricij, pata'aj hua'ajtyá'xi'in néijmi'i metyi'namuáaracaj ì tyeítýee mej mij majta a'íimaj tyu'tyátzaahuatye'en.

21 A'yaa nu tyí'mua'ijcatye' ì Dios jimi nyajta ì Ciriístu' jimi tì ajta Jesús pué'een, nyajta a'íjma jimi ì maj tyí'huiire' ì tajapuá Dios tì hua'antyíhuoj, paj néijmi'i jin a'yan huárinyij je'ej nyaj tyimuáa'ixaaj, capáj séej je'ej jo'séjraj pajta séej xie've'ej, sulu juxa'aj paj néijmi'caa jó'mua'raj.

22 Capáj a'tíj avá'muijhua'an pequee xu jamua'reérej je'ej tì een ì jutzájta', na'ríij quee jamuán paj ootyá'itzeere'ej ì Dios jimi. Pata'aj asíj tyámua' tyi'huá'cha'íin pej pij quee tyi'tíj jin ootyá'itzeere'en ì Dios jimi.

23 Pajta quee a'íj pana'aj ya'caj ì jájtyij, sulu pata'aj cíi ì nahuáj tyu'yé'en, pej pij quee tyí'cui' mua' tzajta'.

24 Je'ej maj séecan tyi'tíj jin tyityá'itzeere', a'íi pu séejre' matí'ij quee xu huá'xijtye'ej, ajta séecan jime', capu je'ej ámiteere' ì maj jin ootyá'itzee, sulu majca'huáyee pu huataséjre'sij.

²⁵ A'yaa pu ajta tyí'sejre' je'ej maj tyi'tíj jin tyámua' ricij, ajta i tiquee tyámua' een capu i'ríj ti huatyóo'avaaj jusén jime'.

6

¹ A'íimaj i maj ca'nyéjrij jin tyí'muarie', a'yaa pu tyúuxie've' maj tzáahuatyí'ra'aj tyícha'íij hua' jimi i maj tyihuá'ijtye', mej mij quee je'ej pua'aj tyá'xajta je'ej tyaj jatamuá'muaj i Dios ti tavástara', ajta je'ej tyaj tyihuá'mua'tyej.

² Ajta tipua'aj séecan i maj tyajá'mua'ijtye' majta tyá'tzaahuaty'e'ej, caxu hua'xahuari'raj a'íjci jime' siaj ju'ihuáamua' i tavástara' jimi. A'yaa xu jéetze' tyámua' tyihuo'táhuüre'en, ji'nye a'íimaj i siaj hua' jimi tyámua' tyí'huüre' a'íi mu majta tyá'tzaahuaty'e' i Dios majta ta'ihuáamua' pué'een i jéehua hua'xie've'.

I ti jì'ré'can jime' jéehua tyí'huüre'

³ Tipua'aj síij a'yan seequéj tyí'mua'taj ajta quee a'yan tyu'mé'en je'ej tyaj ityáj tyaja'muamua'tyej i tavástara' Jesús ti ajta Ciriistu' pué'een jitze ma'can, ajta quee a'yájna je'ej tyaj tyi'tyítacha'ij,

⁴ a'íi pu a'íin pué'een i ti óotzaahuaty'e' ajta quee tyi'tíj huayí'tin. Capu i'ríj tyej tyámua' jamuán tyu'taxáj, a'íj pu jin tyihuá'chueere', ajta je'ej pua'aj tyí'jepe', capu i'ríj ti a'tíj jitzán tyú'ca'nye'j,

⁵ ajta jéehua nyo'se' a'íijma jamuán i maj quee tyámua' metyityoomuámua're', ajta quee jamua'tyej i ti a'yan tyi'ja'yájna, a'yaa pu tyé'miteeraste' maj séecan a'íjna jin tyí'mue'tin

í maj a'yan tyúusejrataj tijin Ciríistu' mu jimi tyí'huíire'.

⁶ Ajta a'yan tyi'ja'yájna tipua'aj a'tíj tyámua' huóo'uurej tí'ij ja'antzaahuatye'en í Dios, a'yaa pu jéehua tya'ancuriáa'sij tipua'aj jutyamua've'ej je'ej tí tyi'tíj tyí'ijcha'ij.

⁷ Ji'nye catu tyi'tíj hua'á'sima'aj tyati'ij a'yan huaséjre í cháanacaj japua, a'íj tu jin tyequée tyajta tyi'tíj á'tinyij íyan tí ma'can í cháanacaj japua,

⁸ tipua'aj tyi'tíj tyéjcha'íij tyaj jáacua'nyij tyajta í tyaj tyu'tyátachejtye'en, tyiche' a'íjna jin huátatyamua've'en.

⁹ Majta a'íimaj, í maj a'yan tyá'xie've' maj huochíjtyaanyi'taj, a'yaa mu een mati'ij í maj cójnari jin huo'tyáaji'quej, a'íi pu'ij hua'tyánaamuaj í hua' tzajta' mej mij a'yan huárinyij je'ej tí hua' jitze tyúuxie've', a'íi pu néijmi'i tyihuáa'ri'raj ajta hua'antypua'ritye'sij jusén jime'.

¹⁰ Ji'nye a'íj pu jitze í túmii tye'rányinyii néijmi'i í tí je'ej pua'aj tyí'een, séecan mu meríj jaatyáxaahuataca' í maj jitzán tyá'tzaahuatye' a'íjna jime' maj jéehua huápu'ij janyacua'aj í túmii, a'íj mu jin jéehua jajpuéjtzij.

I tí huanyo'se'en a'íjna jime' í tí jitzán tyá'tzaahuatye'

¹¹ Pajta muáaj, mu paj Dios jimi séejre', capáj tyi'tíj a'yan uuriaj. Pata'aj tyámua' tyi'tyía'cha'íij, pajta hua'cu'vej, pata'aj tyámua' tyá'tzaahuatye'ej, pajta hua'xie've'ej néijmi'caa,

pajta huatyá'ca'nyej i paj jin jaxaamuijritye', capáj á'atzaahuatya'aj.

¹² Pata'aj a'íjna jin huatyényo'se'en i paj jin tyá'tzaahuatye', capáj yó'jipuan i paj jusén jime' júurij puá'mej, ji'nye a'íj pu jin i Dios muaatajé, a'íj paj jin tyámua' tyu'taxájtaca' jéehua metyi'séeracaj.

¹³ Ajta ijíj, i Dios jimi i ti néijmi'caa tá'caa mej mij júurij, ajta jimí i Ciríistu', i ti ajta xá'pui' tyu'taxájtaca' a'íjna jimi i tajtúhuan ti a'yan ántyapuaaca'aj tijin Poncio Piláato, a'yaa nu tyí'mua'ijtye'

¹⁴ paj a'yan huárinyij je'ej nyaj tyí'mua'ijtye', pajta tyámua' eenye' pej pij quee tyí'tíj jin á'itzeeria'aj, 'asta na'aj quee uvé'nyej i tavástara' Jesús ti ajta Ciríistu' pué'een.

¹⁵ Ajta a'yan tye'mej a'náj ti i Dios a'yan tyaaxá'pui'intarej, ji'nye a'íi pu a'íin pué'een i ti tyihuá'ijtye' a'íijma i maj tajtúhuan jin tyityetyúu'pu', ajta hua' vástara' a'íimaj i tyaj a'yan hua'tamuá'muaj tijin tavástara' i maj a'yan mana'aj séejre' i cháanacaj japua.

¹⁶ A'íi pu'uj a'íin pué'een i ti quee a'náj mui'nyij, ajta a'áa já'sejre' jo'tíj jéehua já'taa, jo'tíj quee já'i'rij ti a'tíj ajtyáxiirej. Capu a'tíj a'náj jaaséj, capu ajta i'ríj ti a'tíj jaaséj. Tyiche' tyaatatyójtzi're'en a'íjna i ti néijmi'i jin an-tyúumua'reej jusén jime'.

¹⁷ A'íimaj i maj chíjtyaanyi'ij pué'een, a'yaa paj tyihuo'ta'íjtye'en maj quee óotzaahuatye'ej, majta quee a'íj jitze tyí'ca'nyej i maj jéehua tyí'ijcha'ij, ji'nye capu tyé'tyeeren i maj jéehua

tyí'ijcha'ij. A'yaa pu tyí'xa'pui' maj a'íjna jitze tyí'ijchó've'ej i Dios, a'íjna i ti juxié'vi'ra' jin jéehua tyitaatapuéjve'sij tyej tyij a'íjna jin huátatyamua've'en.

¹⁸ Pahuo'ta'íjtye'en maj tyámua' huárinyij, miche' a'íjna jin huochíjtyaanyi'taj i maj jéehua tyámua' tyu'muárie'en a'íjna jime' i ti xá'pui' een, majta a'yan tya'ajxié'vi'ra' maj tyihuo'tá'an a'íimaj i maj quee je'ej tyéejviicue', mej mij tyihuo'riáan i maj tyí'ijcha'ij.

¹⁹ A'yaa mu jéehua tya'ancuriáa'sij i maj jin huatyóohuiire'en majca'huáyee, ajta a'yan tyi-huá'cí'tyij maj jusén jime' júurij muá'ra'nyij.

Je'ej ti i Pablo tyaata'íj uve'tyáatican jime' i Timoteo

²⁰ Muáaj Timoteo, pata'aj tyámua' tyéecha'íin je'ej ti tyi'tíj jin i Dios tyimuaata'íj. Capáj huá'astyaj i maj cha'mana'aj tyí'xaj a'íjna jime' i nyúucarij tiquee tyi'tíj huiire', nusu a'íjma i maj a'yan tyóotzaahuatye' maj jéehua tyo'mua'reej, ajta quee a'yan tyi'ja'yájna,

²¹ jí'nye séecan mu meríj huó'namuajri', a'íj mu jin ajtacíj i maj jitzán tyá'tzaahuatye'.

Che' i tavástara' tyámua' tyajamuáahuiire'en ajta tyámua' jamuáa'uurej.

Cora, Santa Teresa
Cora, Santa Teresa: I nyúcarij ti jájcua ti a'ijna
á'xaj i Tavástara' i Jesús ti Ciríistu' pue'een ajta
Salmos New Testament+

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

4f03662f-a4e0-5c7c-a13b-0b7002b5b8f6